

# Provsteqarfinni ataatsimiititalianut il.il. qinersisarneq pillugu Namminersornerullutik Oqartussat nalunaarutaat

Ilageeqarneq pillugu inatsisartut peqqussutaanni nr. 15-imi 28. oktober 1993-imeersumi § 12, imm. 5 naapertorlugu aalajangersarneqarput:

## Kapitali 1.

### *Qinersinissamut piareersarneq*

§ 1. Ukiumi ilagiit sinniisaannut qinersiffiusumi provsteqarfinni ataatsimiititalianut qinersisoqartassaaq majip qaammataani.

§ 2. Ilageeqarnermut naalakkersuisup biskoppip inassuteqarnera malillugu ulloq suna qassinullu qinersisoqarnissaa aalajangissavaa, tamannalu nalunaarutigissallugu qinigassanngortinniarluni nalunaaruteqarnissamut killiliussaq ilanngullugu.

§ 3. Provsteqarfinni tamani palaseqarfiit qinersinermut siulersuisuisa provsteqarfimmi ataatsimiititaliamut qinersinissaq piareersartassavaat qinigaasullu nalunaarsuusiortassallugit. Palaseqarfiup pisortaqarfittut siulersuisuata qinersinermi siulersuisunik pilersitsinissaq isumagissavaa.

*Imm. 2.* Qinersinermi siulersuisut inuttarissavaat palaseqarfiup pisortaa ilagiillu sinniisaat marluk illoqarfimmi ilagiit sinniisuisa qinikkat akunnerminnit qinigaat. Palaseqarf iup pisortaa qinersinermi siulersuisunut siulittaasuussaaq.

§ 4. Ulloq taasivissaq nalunaarutigineqarniariparpat qinersinermi siulersuisut palaseqarfimmi qinersisinnaasut allattorsimaffiat suliarissavaat. Ilagiit sinniisui tamarmik allattorsimaffiliuunneqassapput.

*Imm. 2.* Ilagiit sinniisuinut ilaasortat taasisinnaatitaapput.

*Imm. 3.* Ilaasortat ilagiit sinniisuinut qinigaareer simasut qinigaasinnaapput.

§ 5. Qinigassanngortitanik taakkualu sinniisussaannik nalunaarutiginninneq pissaaq nalunaaruteqarfissaq naalakkersuisunit suliarineqarsimasoq atorlugu.

*Imm. 2.* Nalunaaruteqarfissaq taanna palaseqarfiup qinersinermi siulersuisuinut tunniunneqarsimassaaq kingusinnerpaamik nal. 12.00 qinersinissaq sapaatit akunnerinik marlunnik sioqqullugu.

§ 6. Qinigassanngortinniarluni immersukkami palaseqarfiup qinersisartuisa ilaat ikinnerpaamik tallimat amerlanerpaamillu qulit qinigassanngortitsisutut atsiorsimassapput.

*Imm. 2.* Qinigassanngortitsivimmi allassimassapput qinigassanngortitsisut aqqi, ulloq ukiorlu inuuiat, atorfiat najugaallu.

*Imm. 3.* Qinigassanngortitsisut ilaat ataaseq piginnaatinneqassaaq qinigassanngortitseqatini allat tamaasa sinnerlugit qinigassanngortitsilluni immersugassaq pillugu saaf f iginnissutaasinnaasunik tiguisarnissamut.

**§ 7.** Qinersisinnaasoq kinaluunniit qinigassanngortittunut arlalinnut qinigassanngortitsisusinnaanngilaq.

*Imm. 2.* Ilagiit sinniisuinut ilaasortassanik qinersisinnaasut kisimik qinigassanngortitsisusinnaapput.

**§ 8.** Qinigassanngortilluni nalunaarummi qinigassanngortittoq ataasiinnaq allassimassaaq.

Qinigassanngortittut tamarmik immikkut marlunnik sinniisussaqaassapput.

*Imm. 2.* Qinigassanngortittunik nalunaaruteqarfimmi allattorsimassapput qinigassanngortittup sinniisussaasalu aqqi, ulloq ukiorlu inuuffii, atorfi najugaallu.

*Imm. 3.* Qinigassanngortittoq sinniisussaalu atsiornermikkut nalunaarsimassapput qinigassanngortinnerminnut sinniisussaanerminnullu akuersillutik.

*Imm. 4.* Qinersisinnaallunilu qinigassanngortissinnaasoq ataaseq qinigassanngortittunut arlalinnut sinniisussaasinnaavoq. Qinigassanngortittoq qinigassanngortittunut allanut sinniisussaasinnaavoq.

**§ 9.** Qinigassanngortittunik nalunaarutit tunniunneqarfissaata naanerani qinersinermi siulersuisut aalajangissavaat nalunaarutit tiguneqartut atortussaassanersut. Qinigassanngortitanik nalunaarutit akuerineqartut nuutinneri piaartumik naalakkersuisunut nassiunneqaassapput.

*Imm. 2.* Qinigassanngortittup nalunaarutiginerani kukkuneqarpat qinersinermi siulersuisut qinigassanngortitsisut ullunik marlunnik piffissalissavaat kukkunerup iluarsineqarnissaanut.

**§ 10.** Qinigassanngortittunik nalunaarutiginninnissamut killiliussap naanerani qinigassanngortilluni immersugaq akuerisaq ataasiinnaq tiguneqarsimappat, tassani qinigassanngortittoq qinigaasutut naatsorsuunneqaassaaq.

*Imm. 2.* Qinersinermi siulersuisut tamanna palaseqarfimmi ilagiit sinniisuinut provsteqarfimmilu ataatsimiititaliat suliaasaannik ingerlatsisumut nalunaarutigissavaat.

**§ 11.** Qinigassanngortinniarluni piffissamut killiliussaq § 9-mi, imm. 2-mi taaneqartoq naappat qinigassanngortittut taak-kualu sinniisussaasa aqqi qinersinermi siulersuisut palaseqarfimmi ilagiit sinniisuinut provsteqarfimmilu ataatsimiititaliat suliaasaannik ingerlatsisumut nalunaarutigissavaat.

## **Kapitali 2.**

### *Taasineq*

**§ 12.** Ilagiit sinniisuini siulittuisoq ilaasortarluunniit alla taassuma piginnaatitaa taasinermi pisortaassaaq taasinissallu piareersarneqarnissaa akisussaaffigissallugu.

*Imm. 2.* Taasinermi pisortap isumagissavaa qinigassanngortittut sinniisussaasalu aqqi ineeqqami taasivissami immikkut allagarsiinikkut ilisimatitsissutigineqarnissaat.

*Imm. 3.* Taasineq pissaaq ilagiit sinniisuini ataatsimiinnermi.

*Imm. 4.* Provsteqarfimmi ataatsimiititalianut taasisinnaasut kisimik taasineq siunertaralugu ataatsimiittunut peqataasinnaatitaapput.

**§ 13.** Taasinermi pisortap ilagiit sinniisuini taasineq siulersussavaa.

*Imm. 2.* Taasinissami atorneqaassaaq taasivissaq immikkut ittoq kalaallisut qallunaatullu ima allannilik: "Provsteqarfimmi ataatsimiititalianut qinersineq".

*Imm. 3.* Qinersisup pappiara taasivigissavaa qinigassanngortitap provsteqarfimmi ataatsimiititaliamut qinigaatikumasami aqqa allallugu. Tamatuma kingorna taasivik puusnaanut ikissavaa.

*Imm. 4.* Taasineq naammassiniariarpat qinersinermi siulersuisup allakkat puui imm. 3-mi taaneqartut ataatsimut puussaanut ikissavai. Allakkat puuat taanna qinersinermilu atortussat atorneqarsimanngitsut piaartumik palaseqarfimmi qinersinermi siulersuisunut nassiutissavai.

**§ 14.** Qinersisinnaasoq taasisimasoq kina taasimanerlugu oqaatigissallugu pisussaannngilaq.

### **Kapitali 3.**

#### *Qinersinerup nalunaarsuusiorneqarnera*

**§ 15.** Pappiara taasivik atortussaassanngilaq:

- 1) qinigassanngortittup ataatsip aqqata saniatigut allamik allaffigineqarsimaguni,
- 2) erseqqissumik aalajangerneqarsinnaanngippat qinigassanngortittoq sorleq qinersisup taaniaraluar! simaneraa,
- 3) allakkap puua matoqqasoq taasivissamik ataasiinnaanngitsumik imaqaassagaluarpas,
- 4) isumaqarnassagaluarpas pappiara taasiviusimasooq I peqqussutit malillugit suliarineqarsimanngitsooq.

**§ 16.** Qinersinermit siulersuisut qinersineq nalunaarsuusiussavaat, qinersinerullu inernera provsteqarfimmi ataatsimiititaliat suliassaannik ingerlatsisumut kiisalu palaseqarfimmi ilagiit sinniisunut nalunaarutigissallugu.

**§ 17.** Palaseqarfiup provsteqarfimmi ataatsimiititalianut ilaasortassaatus qinigaassaaq qinigassanngortittoq amerlanerpaanit taaneqarsimasooq.

*Imm. 2.* Qinigassanngortittut arlallit amerlaqatigiinnik taaneqarsimappata siulittaasup tannermoortitsineratigut aalajangerneqassaaq taakkua ilaat sorleq qinigaanersooq.

**§ 18.** Qinersinerup atortussaataitaneranut qinigassanngortittut qinersisinnaasullu maalaaruteqarsinnaapput. Maalaarut allaganngorlugu saqqummiunneqassaaq, naatsumik tunngavilersorlugu, kingusinnerpaamik qinersereernermit ullut arfineq marluk qaangiutsinnagit qinersinermit siulersuisunut tunniunneqassalluni.

*Imm. 2.* Qinersinermit siulersuisut naammagittaalliuut sapinngisamik piaartumik naalakkersuisunut ingerlateqqissavaat, oqaaseqaatigerusutaminnik ilallugu.

*Imm. 3.* Qinersinerit arlaanni annertuumik kukkusooqarsimappat naalakkersuisut qinersineq atortussaatinngissinnaassavaat, taasivinnilu tamani ilaannaanniluunniit qinerseqqinnissaq peqqussutigissallugu.

**§ 19.** Provsteqarfimmi ataatsimiititaliat suliassaannik ingerlatsisup provsteqarfimmi qinigaasut nalunaarsuusiussavai qinersinerullu inernera naalakkersuisunut biskoppimullu nalunaarutigalugu.

**§ 20.** Palaseqarfimmi qinersinerup inernera nalunaarsorneqareerippat erniinnaq qinersinermit atortut tamaasa naalakkersuisunut nassiutissavaat.

### **Kapitali 4.**

#### *Aalajangersakkat assigiinngitsut*

**§ 21.** Naalakkersuisut qinersinermit atortussiornissaq taakkuninngalu nassiussuinissaq aalajangersaaffigissavaat.

**§ 22.** Naalakkersuisut qinersinerup piareersarneqarnerani ingerlanneqarneranilu piginnaatinneqarput nalunaarummi aalajangersarneqarsimasunik allanngortitsisarnissamut, taamaaliornissaq pissutsit, ilaatigut silap qanoq innera, pissutigalugit pisariaqarsorinaraangat, tamatumani qinersinerup isertuussaanera ingerlanneqarneratalu tamakkiisumik nakkutigineqarnera qulakkeersimajuarneqarsinnaappata.

**§ 23.** Pissutsit atuuttut najoqqutaralugit allanngortitsiallassinnaanerit naatsorsuutigalugit kapitalit 1-imiit 4-mut atorineqassapput palaseqarfiit tamarmik immikkut nuna tamakkerlugu ataatsimeersuarnissamut aallartitassaannik qinersineqassatillugu.

§ 24. Nalunaarut una atortuulerpoq 1. august 1994-imi.

*Imm. 2.* Provsteqarfinni ataatsimiititalianut qinersisoqqaassaaq nalunaarutip atortuulernerata kinguninnguagut. Qinersinissami tassani nuna tamakkerlugu ataatsimeersuarnissamut aallatitassanik qinersisoqassanngilaq.

*Namminersornerullutik Oqartussat, ulloq 27. juni 1994*

Marianne Jensen

/

Aqissigiaq Møller

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut